

## 每週經課朗誦經文(巴克禮台語漢字)2015/07/05

### 共同經課 - 1

#### 撒母耳記下五章一節~五節，九節~十節

1 當時以色列眾支派到希伯崙見大衛，講：「看啊，阮是你的骨肉。2 前掃羅做阮的王的時，導以色列出入的是你；耶和華也曾給你講：『你欲照顧我的百姓以色列，也欲做以色列的君王。』」3 對按呢以色列的長老攏來希伯崙見王，大衛王佇希伯崙耶和華的面前及 in 立約，in 就用油抹大衛做以色列的王。4 大衛坐位的時三十歲，伊坐位四十年；5 佇希伯崙做猶大王七年閏六月日，佇耶路撒冷做通以色列及猶大的王三十三年。9 大衛踎佇衛所，稱彼所在做大衛的城。大衛對米羅四圍起造，也向內面。10 大衛愈久愈強盛，因為耶和華——萬軍的上帝及伊佇啲。

### 共同經課 - 2

#### 詩篇四十八篇

1 〔可拉後裔的詩歌。〕耶和華至大！應該大大得著謳嘍，就是佇咱上帝的城，佇伊聖的山。2 錫安山——大君王的城，佇北面高大閣好看，互全地所歡喜。3 上帝佇伊的宮殿內，家己顯明做高台。4 看啊，列王聚集，in 相及對遮經過。5 in 看見就印愕，驚惶緊緊走。6 in 佇遐愕愕，痛疼親像生子的婦仁人。7 你用東風拍破他施的船。8 阮佇萬軍的耶和華的城中——就是阮的上帝的城中——所看見的，抵抵照阮所聽見。上帝欲互此個城堅固到永遠。(細拉) 9 上帝啊，阮佇你的殿內數念你的慈愛。10 上帝啊，你所受的謳嘍抵抵及你的名相合，到佇地極！你的正手滿滿公義。11 因為你的判斷，錫安山著歡喜，猶大的城著快樂。12 恁著惹錫安，四圍行伊，算伊的城樓。13 詳細看伊的城牆，省察伊的王宮，欲互恁宣傳佇後代。14 因為此個上帝永永遠遠做咱的上帝；伊欲導咱，到佇死的時。

### 共同經課 - 3

#### 哥林多後書十二章二節~十節

2 我識一人惦佇基督的，十四年前受帶到第三層天；(或是惦佇身軀，我唔知；或是無惦佇身軀，我也唔知；上帝知。) 3 我識一個親像此號的人(或是惦佇身軀，或是無佇身軀，我唔知，上帝知。) 4 伊受帶到樂園，聽見袂得通講的話，就是人所唔通講的。5 我欲為著此號人誇口；若是為著家己，除我的軟弱以外，我無欲誇口。6 我若愛欲誇口也唔是慇，因為我欲講真實；總是我家己約束，驚了人的評論我卡過頭佇伊所看見我，抑是伊對我所聽見的。7 閣因為諸個啟示的極大，免得我過頭自高，所以互我肉體內有策，就是撒但的使者來拍我，免得我過頭自高。8 為著按呢，我三擺求主，互彼個離開我。9 伊給我講：「有我的恩你就夠額，因為我的氣力是佇人的軟弱來成。」所以，我真歡喜卡愛誇口我諸個軟弱，互基督的氣力住佇我。10 所以我為著基督，掠諸個軟弱、欠缺、窘逐、困迫做歡喜；因為我軟弱的時，反轉有氣力。

### 共同經課 - 4

#### 馬可福音六章一節~十三節

1 耶穌對遐出去，到伊的本鄉；伊的學生隨伊。2 到安息日，就佇會堂教示人。多多人聽見，就奇怪，講：「此個人對叨落會按呢啊？閣所賞賜互伊的智慧是甚麼啊？也有按呢的大權能對伊的嘴出，是怎樣？」3 此個豈唔是木工嗎？豈唔是馬利亞的子雅各、約西、猶大、西門的兄弟嗎？伊的姊妹豈唔是及咱佇遮嗎？」in 就厭賤伊。4 耶穌就給 in 講：「先知佇本鄉、宗族、家己的家以外，無唔尊貴。」5 伊佇遐袂得行甚麼權能，不過用手按幾若個病人，來醫好 in。6 閣奇怪 in 唔信，就四界行許個鄉社教示人。7 耶穌召十二個學生來，就差 in 一對一對出去，賞賜 in 有權，來制壓許個邪神；8 閣吩咐 in：「莫得帶路費，獨獨一支柺仔，莫得乾糧，莫得襪，莫得囤錢佇腰帶；9 著穿出路的鞋，也莫得穿二領衫」；10 閣給 in 講：「見若恁所入的厝，著住佇遐，直到離開彼個地方的時。11 無論甚麼所在唔接納恁，唔聽恁的，到離開遐的時，著拂去腳跡底的土粉，來對 in 做干證。」12 in 就出去宣傳，講人著反悔，13 in 也趕出多多鬼，用油抹多多破病的人，醫好 in。